

Sui-je, sui-je, sui-je belle ?

Eustache Deschamps

Eustache Deschamps

Sui-je, sui-je, sui-je belle ?

Les Poètes français, Gide, librairie, 1861, Tome premier : première période : du XII^e au XVI^e siècle (p. 378-379).

VIRELAI

Sui-je, sui-je, sui-je belle ?
Il me semble, à mon avis,
Que j'ay beau front et doulz viz^[1],
Et la bouche vermeillette ;
Dictes moy se je sui belle.

J'ay vers yeulx, petit sourcis,
Le chief blont^[2], le nez traitis^[3],
Ront menton, blanche gorgette ;
Sui-je, sui-je, sui-je belle ? *etc.*

J'ay dur sain et hault assis,
Lons bras, gresles doys aussis,
Et, par le faulx^[4], sui greslette ;
Dictes moy se je sui belle.

J'ay piez rondes et petiz,
Bien chaussans, et biaux habis,
Je sui gaye et foliette ;
Dictes moy se je sui belle.

J'ay mantiaux fourrez de gris,
J'ay chapiaux, j'ay biaux proffis^[5],
Et d'argent mainte espinglette ;
Sui-je, sui-je, sui-je belle ?

J'ay draps de soye, et tabis,
J'ay draps d'or, et blanc et bis,
J'ay mainte bonne chosette ;
Dictes moy se je sui belle.

Que quinze ans n'ay, je vous dis ;
Moult est mes trésors jolys,
S'en garderay la clavette^[6] ;
Sui-je, sui-je, sui-je belle ?

Bien devra estre hardis
Cilz, qui sera mes amis,
Qui ora tel damoiselle ;
Dictes moy se je sui belle ?

Et par Dieu, je li plevis^[7],
Que très loyal, se je vis,
Li seray, si ne chancelle ;
Sui-je, sui-je, sui-je belle ?

Se courtois est et gentilz,
Vaillans, apers^[8], bien appris,
Il gaignera sa querelle ;
Dictes moy se je sui belle.

C'est uns mondains paradiz
Que d'avoir dame toudiz^[9],
Ainsi fresche, ainsi nouvelle ;
Sui-je, sui-je, sui-je belle ?

Entre vous, acouardiz,
Pensez à ce que je diz ;
Cy fine^[10] ma chansonnette ;
Sui-je, sui-je, sui-je belle ?

1. ⬆.⬆ Visage.
2. ⬆.⬆ La tête blonde.
3. ⬆.⬆ Délicat.
4. ⬆.⬆ La taille.
5. ⬆.⬆ Beaux deniers comptants.
6. ⬆.⬆ La clef.
7. ⬆.⬆ Je lui promets.
8. ⬆.⬆ Franc, aimable.
9. ⬆.⬆ Tous les jours.
10. ⬆.⬆ Ici finit.